

«ԱԶԳԱՅԻՆ ԼԵԳԵՈՆ»Ի ԳՈՐԾՆԱԿԱՆ ՀԱՅՐԵՆԱՍԻՐԱԿԱՆ ՏԻՊԱՐ ՆԱԽԱՁԵՌՆՈՒԹԻՒՆԸ

Posted on March 25, 2022 by Keghart



Category: [Opinions](#)



Հանրության կը ներկայացնենք յոթ կարեւոր, իրատեսական եւ գործնական հայրենասիրութեան տիպար նախաձեռնութիւն մը: Ծանօթացէք հայրենիքի պաշտպանութեան նուիրուած «Ազգային Լեգեոն»ին: Մեր հարցազրոյցին կը պատասխանէ խմբագրութեանս Հայաստանեան կազմի անդամ, պատմաբան Գեորգ Եազըճեան: «Գեղարդ»

Ա.- Որո՞նք են գլխաւոր դրոյապատճառները «Ազգային Լեգեոն»ի նախաձեռնութեան

Ազգային Լեգեոնը (այսուհետ՝ Լեգեոն) ծնաւ, աւելի ճիշդ՝ վերածնաւ անհրաժեշտութենէն մղուած: Լեգեոնը 1990-ականներու սկիզբին եղած է այն կամաւորական խումբերէն, որոնք մարտնչեցան Արցախեան ճակատներուն վրայ ու կերտեցին մեր յաղթանակը: Հրադադարէն ետք, անոր մարտիկներէն ոմանք ընդգրկուեցան ՀՀ-ի բանակին մէջ, ուրիշներ անցան ուրիշ կենսագործունեութեան: Երբ 2020-ի Սեպտեմբերի վերջին վերստին բռնկեցաւ հայ-թրքական պատերազմը, Լեգեոնի նախկին մարտիկներէն քանի մը հոգի, իրենց շուրջ հաւաքելով 18-25 տարեկան երիտասարդներ, հիմնականին մէջ երեւանամերձ Մասիս քաղաքէն, հրամանատար, ՀՀ-ի բանակի պահեստի փոխգնդապետ Լեւոն Գեորգեանի գլխաւորութեամբ, կազմակերպեցին կամաւորականներու նոր խումբ, որ տեղակայուեցաւ Քարվաճառի ճակատին վրայ: Խումբին կը մասնակցէին նաեւ երկու սփիւռքահայեր, թէեւ մօտ 60 տարեկան, մէկը՝ շատոնց հայրենադարձած, միւսը՝ Գանատայէն եկած:

Պատերազմի անյաջող ելքի համազգային ցնցահարուածը համակեց նաեւ Լեգեոնի մարտիկները: 2020-ի Դեկտեմբերին, հոգեցնցումը յաղթահարելով, Քարվաճառի կամաւորականներուն մեծ մասը ճիշդ գտաւ աջ ու ձախ մեղաւորներ գտնելու եւ դատարկաբանութեամբ զբաղելու փոխարէն՝ զբաղիլ ՎԵՐԱԿԱԶՄԱԿԵՐՊՈՒՄՈՎ, քանզի համոզուած էին, որ հայ-թրքական պատերազմի յաջորդ փուլերը անխուսափելի են: Հետեւաբար, անհրաժեշտ էր, առանց ժամանակ վատնելու, կազմակերպուիլ ու պատրաստ ըլլալ ինքնապաշտպանական ու ազատագրական այդ փուլերուն: Ահա այս անհրաժեշտութեան գիտակցումէն վերածնաւ Ազգային Լեգեոնը:

Բ.- Որո՞նք են մասնակիցները

Ազգային Լեգեոնի մասնակիցները կարելի է դասակարգել

- ըստ բնակութեան վայրի՝ հայաստանաբնակներ եւ սփիւռքահայեր,
- ըստ մասնակցութեան «սթաժ»ի՝ Արցախեան առաջին պատերազմի մասնակիցներ, Արցախեան երկրորդ պատերազմի մասնակիցներ, նոր անդամներ
- ըստ տարիքի՝ պատանիներ եւ պարմանուհիներ՝ 14-18 տարեկան, երիտասարդներ ու երիտասարդուհիներ՝ 18-40 տարեկան, տարիքաւորներ՝ 40-62 տարեկան:

Այսօրուայ դրութեամբ, Լեգեոնի գործունեութեան գրեթէ մշտապէս մասնակցողներուն

թիւը մօտեցած է 250 հոգիի, որոնց շուրջ 50 տոկոսը առաջին խումբին, 40 տոկոսը երկրորդ խումբին եւ միայն 10 տոկոսը երրորդ խումբին կը պատկանին:

Լեգեոնի անդամները զանազան զբաղումներու տեր են՝ աշակերտ-աշակերտուհիներ, համալսարանական ուսանող-ուսանողուհիներ, բանուորներ, արհեստավորներ, գիւղատնտեսութեամբ զբաղողներ, գրասենեակային աշխատողներ, մշակոյթի եւ գիտութեան գործիչներ, մանր գործարարներ, տանտիկիներ...

Գ.- Իգական սեռի մասնակիցներ ալ կա՞ն, իսկ եթէ չկան՝ ապագայի համար նկատի առնուա՞ծ է հայ կանանց մասնակցութիւնը

Իգական սեռը Ազգային Լեգեոնի կազմին գրեթէ մէկ երրորդը կը կազմէ: Ունինք բազմափորձ դիպուկահար հրահանգիչ կին, նաեւ երիտասարդուհիներ ու դպրոցական աղջիկներ, որոնք մեծ խանդավառութեամբ կը մասնակցին Լեգեոնի զանազան աշխատանքներուն: Իգական սեռի մասնակցութեան ոչ մէկ սահմանափակում կամ խտրականութիւն կայ: Ընդհակառակը, Լեգեոնի պատասխանատուները միշտ կը քաջալերեն, որ հայ իգական սեռը յաւելեալ մասնակցութիւն ունենայ աշխատանքներուն, նկատի ունենալով, որ փոքրաքանակ ժողովուրդ ըլլալով, մեր իգական սեռը եւս պէտք է ունենայ ռազմական նուազագոյն գիտելիքներ՝ Հայրենիքը ինք եւս ի հարկին պաշտպանելու համար: Բացի այդ, իգական սեռին



Ներկայությունը արու մասնակիցներուն քով կը մեծցնէ պատասխանատուութեան եւ արժանապատուութեան գիտակցումը, հետեւաբար նաեւ՝ մարզումներուն արդիւնաւետութիւնը:



Դ.- Ի՞նչ գլխաւոր կամ կեդրոնական նպատակներ կը հետապնդէ ԱԼ-ը

Ազգային Լեգեոնի հիմնական նպատակը ՀԱՅՐԵՆԱՏԵՐ ՍԵՐՈՒՆԴԻ պատրաստումն է: Այդ նպատակին հասնելու համար՝ մասնակիցներուն կը տրուի համակողմանի դաստիարակութիւն՝ զինուորական տարաբնոյթ հմտութիւններ, բժշկական տարրական գիտելիքներ, գաղափարական եւ հոգեբանական պատրաստութիւն: Չուտ ռազմական տեսակետէ, նպատակն է այնքան վարժ տիրապետել ռազմական գործին, որպէսզի 120 կրակոցէ առնուազն 100-ը հասնի թիրախներուն:

Ե.- Ինչպիսի՞ համագործակցութիւն կայ ԱԼ-ի եւ Ազգային բանակի միջեւ

Ներկայ պահի դրութեամբ, առանձնակի համագործակցութիւն չկայ Ազգային Լեգեոնին եւ ՀՀ-ի բանակին ու ՀՀ-ի պաշտպանութեան նախարարութեան միջեւ: Այդուհանդերձ, կան կապեր Լեգեոնին եւ պետական այս եւ ուրիշ կառոյցներու միջեւ, որոնց մասին նախընտրելի է ներկայիս ակելի չմանրամասնել: Շատ ջերմ, գործակցային յարաբերութիւններ հաստատուած են դպրոցներու տնօրէնութիւններու եւ տեղական ինքնակառավարման քանի մը կառոյցներու հետ (գիւղապետարաններ, քաղաքապետարաններ եւ մարզպետարաններ):



2.- 44-օրեայ

պատերազմի փորձը բացայայտեց «գաղտնի սպասարկողներու» բազմաթիւ դէպքեր, եւ յայտնաբերեց սպայական ու հրամանատարական կազմի մէջ ապիկար, անպատրաստ եւ ՌԴ բանակի հետ վնասակար գործարքներու մէջ մտած գիտուողականներ: Ինչպէ՞ս ապահովուած է ԱԼ-ը այս ուղղութեամբ

Ազգային Լեգեոնը քաղաքական-կուսակցական որեւէ երանգաւորում չունի. աւելին՝ անոր շարքերուն մէջ բացարձակապէս արգիլուած են կուսակցական համակրանքները կամ հակակրանքները Ազգային Լեգեոնի գործունեութեան մէջ խցկելու փորձերը: Լեգեոնին մաս կը կազմեն տարբեր, Նոյնիսկ իրարու հակադրուած կուսակցութիւններու անդամներ ու համակիրներ, որոնց կը միաւորեն միացեալ եւ բոլորի համար ընդհանրական Հայրենիքի ու անկախ պետականութեան գաղափարները: Ով կը փորձէ որեւէ շեղում մտցնել այդ վեհ գաղափարներուն մէջ կամ կը փորձէ ձաղկել զանոնք, տեղնուտեղը տուն կը ճամբուի անվերադարձ: Նոյնը կը կատարուի եթէ երիտասարդներ շիլ հաշիւներով մօտենան կամ վերաբերին Լեգեոնի անդամ աղջիկներուն եւ կիներուն: Իւրաքանչիւր անդամ Նախքան մարզումներուն մասնակցիլը կը տեղեկացուի այս երկու անթոյլատրելի վարքերուն մասին: Չգուշացումը պարբերաբար կը կրկնուի քանի մը շաբաթը մէկ, որպէսզի ան ականջի օղ դառնայ բոլորին համար: Բարեբախտաբար, առ այսօր լուրջ շեղումներ եւ արտաքսումներ չեն պատահած:

Ազգային Լեգեոնի ղեկավարութիւնը օտար որեւէ պետութեան շահերու պաշտպանութեան ամէն ձգտում կամ քարոզչութիւն կը նկատէ անարգանք հայկական անկախ պետականութեան նկատմամբ, եւ աջալուրջօրէն կը հսկէ, որ այդպիսի տարրեր չներթափանցեն Լեգեոնի շարքերը: Նկատուած է, որ օտարներու շահերուն ծառայողներ



Վրենական զինվորական տեղիակալների մեջ: Այդպիսի փորձերը կանխուած են՝ մերժելով այդպիսի օգնութիւնները:

Լեգեոնին անդամակցիլ ուզող չափահասներու պարագային, ղեկավարութիւնը տարբեր խողովակներով ձեռք կը ձգէ տեղեկութիւններ թեկնածուի վարքի, բարքի եւ հնարաւոր կասկածելի կապերուն մասին: Պատահած է, որ երբ թեկնածուին այս որակները չեն համապատասխանած Լեգեոնի անդամակցութեան նուազագոյն չափորոշիչներուն, նրբանկատօրէն մերժուած է թեկնածուն: Վերջինիս խորհուրդ տրուած է ռազմական մարզումներ ստանալ ուրիշ կազմակերպութիւններու մէջ:

Է.- Ի՞նչ էլեկտրոնային օդային «զէնքերու» պէտք ունիք: Կը հաւատա՞ք թէ ՀՀ ներկայ իշխանութիւնները, յատկապէս Ռազմական եւ Ազգային Ապահովութեան նախարարութիւնները մրցակից մը չեն տեսնելու ԱԼ-ի մէջ

Լեգեոնին անդամները կը ստանան անօդաչու թռչող սարքեր ղեկավարելու տարրական գիտելիքներ: Ունինք ուսումնական նպատակներու ծառայող ԱԹՍ մը՝ նուէր ստացուած Լեգեոնի համահիմնադիր, քանատահայ Վիգէն Տարագճեանէն: Նպատակը անդամները վարժեցնելն է ԱԹՍ-ի գաղտնիքներուն, մանաւանդ զգուշանալը ԱԹՍ-ի հարուածներէն:

Չենք կարծեր, թէ ՀՀ-ի պետական կառոյցները մրցակից կը նկատեն կամ կրնան նկատել Ազգային Լեգեոնը: Նման բանի որեւէ հիմք չկայ: Ազգային Լեգեոնը կամաւորներու աշխարհագօր է եւ իրեն կը համարէ ԼՐԱՅՆՈՂ մը, ՕԳՆԱԿԱՆ մը մեր պետական բանակին՝ պատրաստ անվերապահօրէն ենթարկուելու ՀՀ-ի զինուած ոյժերու հրամանատարութեան՝ ի պաշտպանութիւն հայրենեաց: 44-օրեայ պատերազմի օրերուն, Ազգային Լեգեոնը իր հրամանները կը ստանար ՀՀ-ի բանակի Քարվաճառի զօրամասի հրամանատարութենէն: Ի դէպ, արտասահմանէն ստացուած կարգ մը զինական կազմածներ, այդ թիւին՝ ԱԹՍ մը, Ազգային Լեգեոնը պատերազմի օրերուն նուիրեց այդ զօրամասին:

Ը.- Ինչպէ՞ս կը վերաբերի հանրութիւնը ԱԼ-ի հանդէպ

Հանրութեան վերաբերմունքը Ազգային Լեգեոնի գործունեութեան նկատմամբ յոյժ դրական է: Անդամ երեխաներու ծնողներ երբեմն ներկայ կ'ըլլան տարաբնոյթ մարզումներուն եւ անձամբ կը համոզուին Լեգեոնի գործունեութեան օգտակար բնոյթին՝ իրենց երեխաներու մարմնական, մտային, հոգեկան եւ գաղափարական կազմաւորման մէջ: Անոնք եւ ուրիշներ իրենց բարեացակամ վերաբերմունքը կ'արտայայտեն

զանազան ձեւերով գումարներ, կազմաձևեր եւ այլ իրերէն սուղորելով, իրենց շրջանակներուն մէջ հանգանակութիւններ կազմակերպելով, ուրիշ ծնողներ համոզելով իրենց պատանի զաւակները յանձնել լեգեոնական դաստիարակութեան եւ այլն: Կ'արժէ այս առթիւ յայտնել, թէ Լեգեոնին կ'անդամակցին Հայաստանի ազգային հերոս Մովսէս Գորգիսեանի պարման թոռնուհին ու Երեւանի նախկին քաղաքապետ, դերասան Հայկ Մարութեանի պատանի որդին: Գորգիսեանի դուստրը, ներկայ գտնուելով մարզումներէն մէկուն, առաջարկեց, որ Լեգեոնը մարզումներ կատարէ իր տնօրինած դպրոցի բարձր կարգերու աշակերտ-աշակերտուհիներուն համար: Անշուշտ, առաջարկը սիրով ընդունուեցաւ. մարզումներու ամբողջական ծրագիր մը կազմուած է եւ գործնական աշխատանքներու սկիզբը օրերու հարց է:

Լեգեոնի հրահանգիչները կ'ընդառաջեն ազգօգուտ ուրիշ խնդրանքներու եւս: Օրինակ, վերջերս, գործակցաբար Արենի խոշորացուած համայնքի համայնքապետարանին, սկսան շրջանի երիտասարդութեան ռազմական պատրաստութեան դասընթացները: Համայնքի գիւղերը գտնուելով անմիջապէս Նախիջեւանի հետ սահմանին, կարիքն ունին ժողովրդային պաշտպանութեան՝ նենգ թշնամիի յարձակումներու պարագային բանակայիններուն կողքին դիմակայելու համար թշնամիին: Եւ ահա՛ այդ գործը եւս իր վրայ վերցուց Ազգային Լեգեոնը: Եթէ 6 մարտ 2022-ի մարզումներուն ներկայացած էր 32 հոգի, մէկ շաբաթ ետք այդ թիւը բարձրացաւ 162-ի: 2021-ի գարունէն մարզումներ կը կատարուին նաեւ Մասիս քաղաքի եւ կից շրջանի Սօս գիւղի դպրոցներուն մէջ: 2022-ի տարեսկիզբէն կ'ընթանան Լեգեոնի կազմակերպած ռազմահայրենասիրական դասերը Երեւանի երկու դպրոցներու մէջ՝ 14-17 տարեկան պատանի-պարմանիներու հետ: Կազմուած են աշխարհագորայիններու խումբեր Կիւմրիի, Նոյեմբերեանի, Աբովեանի, Սիսիանի եւ Մեղրիի մէջ, որոնց մարզումներու ծրագիրները թէեւ պատրաստ են, սակայն Լեգեոնի հրահանգիչներու քանակն ու ռազմական անհրաժեշտ հանդերձանքը ներկայիս անբաւարար են բոլորին կարիքներուն հասնելու համար. այս ուղղութեամբ եւս քայլեր կ'առնուին:



Թ.- Մտիկ ապագայի համար ծրագիր կա՞յ թուրքերենի ուսուցման

Ազգային Լեգեոնի ծրագիրը ներկայիս չի ներառեր լեզուներու ուսուցումը: Սա չի նշանակեր, թե հետագային նման դասընթացներ կրնան չընդգրկուիլ: Լեգեոնին ղեկավարութիւնը յատուկ ուշադրութիւն կը դարձնէ անդամներուն տալու անհրաժեշտ գիտելիքներ թուրքիոյ եւ Ատրպէյճանի, մասնաւորաբար անոնց բանակներու զանազան երեսակներուն մասին, ներկայացնելու անոնց թոյլ եւ ուժեղ կողմերը: Լեգեոնը կ'ուսուցանէ երբեք չթերագնահատել թշնամիներուն կարողութիւնները, ո՛չ ալ զանոնք գերագնահատել, այլ միշտ իրապաշտութեամբ վերաբերիլ թե՛ բարեկամներու, թե՛ թշնամիներու հնարաւորութիւններուն եւ կարողութիւններուն: Կասկած չկայ, թե թշնամիներու լեզուներուն իմացութիւնը, առաւել եւս՝ անոնց տիրապետումը, կարեւոր ու յաւելեալ տարր մըն է Հայրենիքի պաշտպանութեան գործին մէջ:

ՄՐՏԱԳԻՆ ԿՈՉ ԵՒ ԱՏՈՐԱԳՐԱՀԱԻԱՔ ՓՐԿԵՆՔ ՀԱՅԵՐԵՆԸ

Comments



Samuel D – 2022-04-22 22:43:56

Long live our Armenian soldiers defending Armenia and Artsakh! Mer Hayasdan, Mer Artsakh, azad linee mer teshnameenerits .